



金石錄



金石錄卷二十五

唐褚亮碑

唐洛州刺史貫公清德頌

唐歐陽詢妻徐夫人墓誌

唐襄州刺史封公碑

唐襄州孔子廟堂碑

唐奉禮郎岑子輿墓誌

唐醴泉縣令張仁蘊德政碑

周武后升中述志碑

周武后封嶽碑

周昇仙太子碑

周大雲寺碑

周武士護碑

周孔昌寓碑

周崔敬嗣墓誌

唐祝府君碑

唐秦州都督唐宗碑

唐工部尚書姚璹碑

後周宇文舉碑

唐魏叔瑜妻王夫人墓誌

唐兵部侍郎崔兢墓誌

唐中興聖教序

唐聖教序碑側

唐徐有功碑

唐国子祭酒武承規墓誌

唐陝州刺史劉延景碑

唐脩封禪壇記

唐褚亮碑

又唐褚亮碑唐書云亮杭州錢塘人而碑云晉南遷家于丹陽按元和姓纂自有錢唐褚氏與亮族不同系唐

史蓋失之

唐洛州刺史賈公清德頌

右唐洛州刺史賈公清德頌按唐史循吏傳賈敦頤敦實相繼為洛州刺史長史有惠愛群人皆為刻石號宗棣碑今敦實之碑亡矣此碑載初除洛州制書有云三川之境是稱都會六條之寄九屬時英蒲州刺史賈敦曠體業強正識用優敏蓋其名乃敦曠也又武后實錄敦實傳中亦作敦曠以此知唐史傳寫之誤又按法書要錄此碑王知敬書以知敬所書他石刻校之字畫不類未知果知敬書否也

唐歐陽詢妻徐夫人墓誌

右唐歐陽詢妻徐氏墓誌云徐始以夫恩封渤海郡君尋加渤海郡夫人最後以子恩封渤海太縣君按本朝之制婦人既封郡君或郡夫人再以子貴加恩則直封為郡太君郡太夫人不復為縣太君矣今徐既以夫貴封夫人後以子恩終封為太縣君蓋一時之制如此又不曰縣太君而曰太縣君與今名魏亦異也唐世婦人封也次叙史家不載偶見于此志云

唐襄州刺史封公碑

右唐襄州刺史封公碑宋之慈畫字畫頗佳之慈之間

弟也兄弟皆小人之孫奴事武三思三思五狗之孫乃其一以此知書持小技苟非其人亦何足貴哉

唐襄州孔子廟堂碑

右唐襄州孔子廟堂碑于敬之撰其前題魯大司寇贈太師宣尼父孔丘廟堂碑名春秋之法或書字或書名皆所以寓褒貶之意今敬之為孔子廟碑而斥其名何哉

唐奉禮郎岑子輿墓誌

右唐岑子輿墓誌云君諱子輿字安道南陽棘陽人也曾祖之家祖文本父曼倩按元和姓纂及新唐書宰相

世系表載曼倩四子獻義仲翔仲休而無子輿今墓誌云次第獻前太子典膳次第前義成均監主簿而無仲翔仲休墓誌既云獻義等則不云仲翔仲休容有之惟子輿乃曼倩長子姓纂與世系表當書而闕者何也

唐醴泉縣令張仁蘊德政碑

右唐醴泉縣令張仁蘊德政碑長壽三年立醴泉尉顏真卿書按魯公雖嘗為此官然在開元間而魯公以貞元元年為李希烈所害年七十六上距長壽三年實九十餘歲是時猶未生也又筆法與魯公他書不類以此疑有姓名同者然碑武后時立而不用當時所製字或

六碑雖建於長壽中至魯公為尉重書而刻之未可知也據新史紀傳魯公以貞元元年被害年七十六而舊史德宗實錄皆云沒於興元元年七年十七疑新史誤

### 周武后升中述志碑

后周武后升中述志碑武后自撰睿宗書碑極壯偉立於嵩之山巔其陰鍾紹京書字畫皆工妙政和中河南尹上言請碎其碑從之

### 周武后封中嶽碑

右周武后封中嶽碑已残缺書撰人名皆不可考然驗其筆跡蓋薛稷書也

### 周昇仙太子碑

右周昇仙太子碑武后撰并書昇仙太子者王子晉也是時張易之昌宗兄弟方有寵諂諛者以昌宗為子晉後身故武后為葺其祠親銘而書於其碑君臣宣淫無恥類如此可發萬古之一笑也

### 周大雲寺碑

右大雲寺碑賈膺福撰并八分書其筆法精妙可喜按舊唐史云武后鑄九鼎圖寫山川物像命工書人賈膺福薛昌客李元振鍾紹京等分題之紹京之書世固多有膺福筆跡雖僅存然世亦未嘗有稱之者如昌客等

書遂不得見以此知士所以自著于不朽者果在德而不在藝也

### 周武士護碑

右周武士護碑武后時追尊士護為無上孝明皇帝命李嶠為碑文相王旦書石馬戎幕閑談載李德裕言昔為太原從事見公牘中有文水縣牒稱武士護墓碑元和年忽失龜頭所在碑上有武字凡十一處皆鐫去之碑高大非人力所及未幾武元衡遇害今此碑武字最多皆刻畫完好無訛缺者以此知小說所載事多荒誕不可信類如此

### 周孔昌寓碑

右周孔昌寓碑載其世系甚詳云宣尼父三十六世孫也十四世祖潛吳侍中生晉豫章太守竺竺主大尚書冲冲生大司農侃侃生秘書監滔滔生江夏太守俟俟生宋尚書左丞幼幼生尚書右丞遙之遙之生中書侍郎畢畢生齊散騎常侍珮珮生梁侍中休源休源生陳黃門侍郎宗範宗範生陳散騎常視伯魚伯魚生隋秘書正字德紹德紹生昌寓唐以前士人以族姓為重故雖更千百年歷數十世皆可攷究自唐永五代之亂在朝者皆武夫悍卒於是譜牒散失士大夫茫然不知其



族系之所自出豈不可惜也哉故余詳錄于此使後李  
論姓氏者有考焉按此碑及梁史皆云休源冲八世孫  
而元和姓纂獨以為七代孫誤矣

周崔敬嗣墓誌

右周崔敬嗣墓誌云祖咸考表而元和姓纂以咸為誠  
表為儀表又新唐書崔光遠傳中宗在房州官吏皆不  
為禮光遠祖敬嗣為刺史獨尽誠推奉帝德之及反正  
有與敬嗣同姓名者每擬官帝輒起拜後召見悟是非  
訪敬嗣已死即授其子汪五品官汪生光遠今以墓誌  
考之敬嗣武后時實為房州刺史然墓誌載敬嗣長子  
悅次子協而無名汪者而姓纂亦云悅生光遠然則以  
悅為汪蓋史誤也敬嗣卒於證聖元年中宗反正其歿  
已久屢遷他人官而不悟可謂昏矣

唐祝府君碑

右唐祝府君碑府君諱緄欽明父也碑欽明自撰今南  
京有漢祝睦兩碑其一言君兆自重黎祝融苗胃其一  
言其光高辛余按諸書重黎祝融皆帝高陽之後帝堯  
高辛之子也睦碑既云出於重黎祝融又云出於高辛  
自牴牾莫可究考而此碑引世本氏姓篇云祝氏軒  
轅之後也史記周本紀武王刻殷封黃帝之後於祝帝

堯之後於薊樂記云封黃帝之後於薊帝堯之後於祝  
蓋以黃堯末下開同出有熊由此史傳相交祝薊之舉  
參考世本馬遷近之然司馬遷史記於族系多采世本  
不知世本果可盡信否蓋君子於學有所不知闕焉可  
也

### 唐秦州都督唐宗碑

右唐宗碑云君諱宗字徵仁而唐書宰相世系表云名  
世宗碑又云祖諱子政而世系表作二政皆當以碑為  
正宗宰相休璟祖也仕隋為朔方郡丞行守郡事大業  
末為賊梁師都所殺神龍中贈秦州都督

### 唐工部尚書姚璿碑

右唐姚璿碑按新唐書璿列傳云為夏官侍郎坐族第  
敬節叛貶桂州長史而碑云自兵部侍郎以敬節犯法  
改授司府少卿檢校定州刺史尋即真轉都督廣狷等  
二十三州諸軍事廣州刺史後替還仍以前累重貶桂  
州又璿為宰相時嘗為西京留守而史不載璿以妖妄  
諂諛事武后其事蹟皆不足取而於官秩闕漏不可不  
記者所以正史官之失也璿徵時所歷官列傳尤簡畧  
今皆不復載云

### 後周宇文舉碑

右後周宇文舉碑盧思道撰神龍中其曾孫敞追建以後周書考之官闕事跡多同惟碑云公諱舉字神舉而史但言名神舉而已又史云其曾祖名求男而碑止言名求史云祖名顯和而碑止言名和亦皆不同其卒也史云宣帝以宿憾殺之而碑稱遘疾薨疑作碑者為諱其事當以史為正

唐魏叔瑜妻王夫人墓誌

右唐王夫人墓誌夫人魏叔瑜妻華之母也誌無書撰人姓名驗其筆法蓋華自書華以草隸擅名一時然石刻見于今者絕少此誌世尤罕傳云

唐兵部侍郎崔兢墓誌

右唐崔兢墓誌云公諱兢字明慎祖敦禮父守業案舊唐書敦禮列傳云孫貞慎神龍初為兵部侍郎元和姓纂新史宰相世系表所書亦同今以墓誌考之其家世及名位皆合惟不著其名而以名為貞者皆唐史及姓纂之闕誤也

唐中興聖教序

右唐中興聖教序中宗為三藏法師義淨所作唐奉一書刻石在濟南長清縣界四禪寺寺在深山中淨義真身塔尚存余屢往游焉得此文入錄案御史臺記奉一

濟州人善書翰武后時為御史後坐誅剪皇族廢

唐聖教序碑側

右聖教序碑側云則天嘗得玉冊上有名十一字朝野不能識義淨能讀其文曰天冊神皇萬歲忠輔聖母長安證聖元年五月上之詔書褒答案宋莒公紀年通譜武后以證聖九年九月授天冊金輪聖人之號故大赦改元先是司籙局人於水際得石函有玉冊云神皇萬歲忠輔聖母長安故改元協瑞其文與義淨所載小異云余嘗謂義淨方外之人而區區為武后稱述符命可笑也然陶弘景號稱一代高士在梁武時亦屢上圖識

豈獨義淨哉

唐徐有功碑

右唐徐有功碑徐彥伯撰以新舊唐史考之其本末皆同惟舊史云長安二年卒年六十二碑云三年卒年六十八新史亦年六十八與碑合

唐因祭酒武承規墓誌

右唐武承規墓誌蘇頲撰顏魯公家廟碑載魯公之人名惟貞字叔堅嘗為太子文學今此誌題太子文學顏叔堅書豈非以字行乎家廟碑又稱叔堅受筆法於舅殷仲容持以草隸擅名云

唐陝州刺史劉延景碑

右唐劉延景碑延景女為睿宗妃生讓帝者碑云夫人房氏以景雲元年贈沛國夫人二年歲次丁亥祔寔于延景之墓按睿宗以景雲元年六月即位改元歲次庚戌明年歲在辛亥而碑作丁亥誤也碑載延景四子溫玉承顏璵琪而和元姓纂以璵為瑗蓋姓纂之謬

唐脩封禪壇記

右唐脩封禪壇記賈膺福書初余得膺福八分書大雲寺記愛其筆法後又得此記字為小楷尤工妙可喜云  
金石錄

金石錄卷二十六

唐并州長史崔敬嗣碑

唐贈右僕射王洎碑

唐嵩州督都姚懿碑

唐盧懷慎碑

唐琅邪王冲墓誌

唐玄元觀尹尊師碑

唐河侯新祠頌

唐郭知運碑

唐大雲寺禪院碑

唐六公詠

唐涼國長公主碑

唐衛尉正卿泉君碑

唐左驍尉大將趙元禮碑

唐王方翼碑

唐龍角山紀聖銘

唐冠軍大將軍減懷亮碑

唐瀟灌碑

唐楊曆碑

唐汝陽王長女墓誌

唐南嶽真君碑

唐立梁宣帝明帝二陵碑

唐孝義寺碑陰碑

唐景陽井碑

唐大國長公主碑

唐趙冬曦祭仲山甫文

唐解琬碑

唐贈哀州都督裴守真碑

唐七留令邢義碑

唐并州長史崔敬嗣碑

右唐崔敬嗣碑按唐史崔光遠傳中宗在房州光遠之  
祖敬嗣為刺史盡誠推奉帝德之及反正有與敬嗣同  
姓名者每擬官輒超拜後召見悟非是訪真敬嗣已死  
乃用其子余集錄有光遠祖墓誌其卒在武后朝此碑  
敬嗣蓋中宗時誤遷官者也而碑乃云景龍元年有制  
追不時至中宗對宰相稱其姓名三令使者趣之及謁  
見即日拜羽林將軍二說不同豈中宗既見乃悟其非  
是欤

唐贈右僕射王洎碑

右唐王洎碑洎王仁皎父也元和姓纂唐書宰相世系

表皆云名文洎而碑云名洎字文洎云

唐嵩州都督姚懿碑

右唐姚懿碑懿崇父也據碑及唐書宰相世系表皆云公  
諱懿字善意而崇子奕碑與元和姓纂乃云名善意  
豈非以字行乎懿隋末唐初人仕至嵩州都督開元間  
崇為宰相立此碑

唐盧懷慎碑

右唐盧懷慎碑蘇頲撰其叙懷慎官闕甚畧云公諱懷  
慎字懷慎而史不載其字又云上同游廓杜北望京闕  
歸然有公之別廬抵其宅室甚陋據此所書乃明皇嘗

親幸其弟而史云馳使問之非也史又云懷慎厲疾宋璟盧從愿候之臨別執二人手曰上求治切然享國久稍勦于勤將有儉人乘間而進矣蓋謂楊李也果如此懷慎可謂先見然獨新史有之舊史不載按懷慎以開元四年卒是時明皇新即位登用賢俊銳於為治之時也乃曰享國久倦于勤何哉疑初無此事蓋唐史喜取小說所載故事多謬誤以此知是非亡取秉史筆者豈可不慎

唐琅邪王冲墓誌

右唐琅邪王冲墓誌冲越王貞子也中宗遷房陵貞與

冲謀反正舉兵未幾父子皆敗開元六年始詔陪葬昭陵武后革命毒流海內而唐睿宗室被禍尤甚冲父子特畏誅翦故率兵尔非有他謀也倉卒無援卒就夷滅哀哉

唐玄元觀尹尊師碑

右唐尹尊師碑郭謙光八分書謙光八分初不見称於唐人歐陽公獨称之以謂不域韓蔡史李四家余因訪求之久得崔敬嗣及此碑著錄焉

唐河侯新祠頌

右唐河侯新祠頌秦宗撰云河伯姓馮名夷字公子潼



鄉華陰人也按張懷太子張衡傳注引聖賢墓家記亦云馮夷者弘農華陰潼鄉隄首里人服八石得水仙為河伯又引龍魚河圖曰河伯姓呂名公子夫人姓馮名夷三說雖異然其為無所稽據則同也嗚呼自古荒誕之說惑人雖聰明之士猶或不免况庸人乎

### 唐郭知運碑

右唐郭知運碑蘇頲撰知運有兩碑其一張說文唐書知運傳載其子二人曰英傑英又而蘇張二公所為碑書其子四人曰英傑英奇英協英彥而無英又歐陽公疑焉以謂英奇等三子皆在唐不顯史家闕漏或有之

英又嘗為西川節度使其事甚著史官不應差其世家而蘇張二公作銘在知運卒後不遠亦不應闕其子孫莫可究其孰失余按代宗實錄云英又知運季子而元載所為英又墓碑亦云隴右節度使知運公之皇考也然則英又為知運子無疑又按英又碑云公以天寶二載筮仕蓋知運以開元九年卒明年立碑碑所載諸子皆以有名位英又時方孩幼且未從仕故碑不載尔余又嘗得徐浩所為英傑碑有云移孝於忠二葉四將齊名當代同氣十人然則知運諸子碑傳闕漏者尚多不獨此三人而

德宗實錄又有郭英幹云英義弟也

唐大雲禪院碑

右唐大雲寺禪院碑李邕撰并書初武后時有僧上大雲經陳述符命遂於天下立大雲寺至開元二十六年詔改為開元寺此碑十一年建故猶稱大雲也

唐六公詠

右唐六公詠李邕撰胡履虛書初余讀杜甫八哀詩云卽詠六公篇憂來豁蒙蔽恨不見其詩晚得石本入錄其文詞高古真一代佳作也六公五王為一章狄丞相別為一章云

唐涼國長公主碑

右唐涼國長公主碑蘇頲撰明皇書公主睿宗女也新唐書列傳云字華莊而碑云諱菟字花莊傳云下嫁薛伯陽而碑云嫁溫彥博曾孫曦按新史睿宗第三女荆山公主已嫁薛伯陽當以碑為正

唐衛尉正卿泉君碑

右唐泉君碑泉君者高麗蘇文之孫泉男生之子也高宗時與男生同歸朝仕為衛尉卿按唐書及本和姓纂皆云名獻誠今此碑乃云諱寔字行於代而闕其字不書又姓纂云獻誠生玄隱而碑但云名隱而已獻誠出於夷虜事跡無足考究錄之以見史傳所載名字異同

也

唐左驍衛大將軍趙元禮碑

右唐趙元禮碑潘肅撰元禮麗妃之父本山東倡也明皇在潞鹿妃以倡得幸後生太子瑛開元初元禮父子皆超遷顯官其卒贈越州都督謚曰忠詔為立碑称述甚勝夫爵祿天下公器所以待有德與有功者雖人主不得而私焉明皇昵於內寵擢用匪人至焉賜謚立碑尊寵如此使天下之士亦何所勸乎論者徒知明皇自天寶以後緇紀廢弛卒致播隱之禍不知衽席無別履霜不戒所從來久矣

唐王方翼碑

右唐王方翼碑張說撰其事與唐書列傳皆合以按余家所藏燕公集本不同者二十餘字皆當以碑為是也

唐龍角山紀聖銘

右唐龍角山紀聖銘明皇撰按高祖實錄武德三年四月辛巳晉州人吉善行於羊角山見白衣老父乘白馬朱鬣謂善行曰謂吾語唐天子吾為老君汝祖也今年平賊後汝當為帝天下太平必得百年享國子孫且千歲太宗遣使者杜昂致祭頌臯神復見謂昂曰歸語天子我不食何煩祭為高祖異之立廟于其地授善行朝散大

夫據碑稱是時太宗為秦王討宋金剛所謂賊平汝當為帝者指太宗也其事可謂恠矣然碑與實錄所載語頗不同文多不能備錄惟碑稱善行以武德三年二月初奉神教至四月老子又見曰石龜出吾言實既而太宗遣昂善行乘駟表上比至長安適會郿州獻瑞石石如龜文曰天下安千萬日而實錄亦云郿州獻瑞石有文曰天下千萬其語小異又碑稱善行絳州人而實錄云晉州尔老子其生以清淨無為為宗豈身沒數千歲而區區為人稱述符命哉蓋太宗初起託以自神比陳勝所謂卜之鬼者也史臣既載於實錄明皇又文之

于碑遂以後來為真可欺罔豈不可笑也哉

唐冠軍大將軍臧懷亮碑

右唐臧懷亮碑李邕撰并書臧氏世墓在耀州三元有數碑余尽得之元和姓纂云懷亮生希讓為渭北節度使此具載懷亮諸子無名希讓者以余家所有顏魯公書懷恪碑考之希讓蓋懷恪子云

唐蕭灌碑

右唐蕭灌碑張說撰云灌以內直監以外艱去職當免喪不就祥縞不撤几筵者久之夫禮而可傳也為可繼也子路有姊之喪可以除之矣而弗除也孔子曰何弗除

也子路曰吾寡兄弟而弗忍也孔子曰先王之制礼行道之人皆不忍也子路聞之遂除之灌父喪當除其母無恙而過時不釋服不撤几筵豈禮也哉

唐楊曆碑

右唐楊曆碑題云義男光祿大夫前中書令上柱國越國公太子右諭德潁川鍾紹京撰銘拜書曆中官楊思勗父也紹京出於胥史無他才能特以寅緣附會致位宰相固無足道者然屈於閹豎至以父事之又以著之金石畧無愧恥甚矣書之可以為後來之戒而新舊史皆闕焉故余詳錄之于此者有以見小人苟可以得利

無不為也

唐汝陽王長女墓誌

右唐汝陽王長女墓誌寧王撰唐史及諸書汝陽王名皆為璿而此誌獨此作淳誌寧王自作不應差誤案寧王諸子與玄宗子名皆從玉疑汝陽先生名淳後改為璿唐史不載耳

玄宗諸子名皆初從水後改從玉也

唐南嶽真君碑

右唐南嶽真君碑有別駕賞紫金魚袋光大撰歐陽公云賞紫蓋今借紫之比余按唐制自有借紫借緋而又有賞紫賞緋蓋以軍功被賞者耳

唐立梁宣帝明帝二陵碑

右唐立梁宣帝<sup>明</sup>二陵碑開元二十一年其裔孫高追建其前題銀青光祿大夫黃門侍郎同中書門下平章事而姓名已殘缺按唐紀開元二十一年韓休實為此官然則此碑乃休之文也碑後題金紫光祿大夫行光祿卿駙馬都尉而姓名已殘缺者蓋嵩之子衡也

唐孝義寺碑陰記

右唐孝義寺碑陰記初陳徐陵為孝義寺碑至開元一十三年徐嶠之為湖州刺史再書而刻之因記其事于碑陰嶠之自云陵十世孫按陳書陵以後主至德元年

卒距開元二十三年才百五十餘年不應已有十世孫又據嶠之父高行先生碑云曾祖儼涿岳陽王參軍則是儼與陵同時而在其前不應為陵五世孫以此碑陰所書可疑然則筆法精妙非嶠之不能為特恐書碑時誤耳

唐景陽井銘

右唐景陽井銘文字摩滅後有記開元中江寧縣丞王震撰震所撰記其前以為序稱余莫知誰也其末乃云蓋隋煬帝之所製耳然則未知果煬帝之所製乎歐陽文忠公曰煬帝躬自城陳目見叔寶事又嘗自銘以為

戒如此及身為淫亂則又過之豈所謂下愚不移者哉  
余以謂煬帝躬賊其父而奪之位其凶忍狂悖人神之  
所憤疾死益晚矣至於長惡不悛以亡其國乃所當然  
又何足議焉

唐代國公主碑

右唐代國長公主碑云公主睿宗第四女也新唐史以  
為第五女蓋史誤碑云公主璿鄭萬鈞撰

唐趙冬曦祭仲山甫文

右唐趙冬曦祭仲山甫文開元二十二年冬曦為濮州  
刺史因明皇耕籍田致祭刻此文焉按樂史寰宇記仲

山甫墓在雷澤縣西北一里墓前有祠堂石室而酈道

元注水經成陽燒陵北二里有仲山甫墓考地驗狀咸

為踈僻蓋聞疑書疑耳余嘗得其石室畫像上有八分

書題云君為從事時以畫及衣冠人物驗之乃東漢時

所為決非山甫墓漢末仲氏為成陽大族堯母碑陰題

名數十人皆仲氏而廷尉定以下三碑尚存廷尉碑云

聖漢龍興家于成陽孟府君堯廟碑云惟仲氏祖統所

繼出本繼於成周之胄苗天生仲山甫翼佐中興宣平

功遂受封於樊周道衰微夫爵亡邦後嗣乖散各相土

擇居帝堯萌兆生長葵陵在於成陽聖化常存墓魏都

之盛樂風俗之美遂安慶基業屬都鄉高相里因仲氏蓋後人因仲氏葬於此遂誤指為仲山甫墓其實非也

### 唐解琬碑

右唐解琬碑武后中睿朝為將有功新舊史皆有傳所書事跡終始與碑多合惟碑與舊史皆云琬以開元六年卒而新史以為卒於五年者誤也

### 唐贈袁州都督裴守真碑

右唐裴守真碑云守真曾祖景周富平令祖正長平郡贊治考春鄴令新唐史宰相世系表亦云景生正隋散

騎長侍正生脊字歸厚為鄴令而元和姓纂乃云正生歸厚歸厚生脊者誤矣惟守真及其子耀卿碑皆云正為長平郡贊治而世系表言為散騎常侍又云脊字歸厚不知何所據也

### 唐屯留令邢義碑

右唐邢義碑義邢和璞父也元和姓纂云和璞父名思孝為澧州都督而碑乃云公諱義字思義仕為屯留令又姓纂云後魏光祿卿邢虬虬生臧臧孫玄助玄助生思孝思孝生和璞而碑乃云玄助之祖名子良皆當以碑為據



金石錄





